

四庫全書

集部

欽定四庫全書

東里續集卷五十二

明 楊士奇 撰

家書

示稷子書

十九首

去歲以汝母子城外非久居之計令於東門祖地上作  
居移回亦作書奉吾兄達知此事近吾兄復書云東門  
屋地是彥中房下之業非吾曾祖待制公房下之業彥  
中是吾兄所承繼之父若如此說則是我妄爭此土矣

妄爭者閭閻小人所不忍為而謂我為此乎我平生未嘗於他人有一毫之妄爭乃肯施之於兄乎汝不能知吾今畧言之待制公同父母兄弟三人分三大房皆在東門一處住長房是今容安之高祖會可第二房是彥中之祖聖可第三是待制公彥中之父公安最富後來擴充屋地却多於兩房吾待制公致仕回子孫衆盛遂買官濠下土作居移住獨留第五子公武仍於東門居住公武兄弟五人田產各已分惟屋業實未分也公

武後無子子言叔承繼之洪武年中子言叔子超叔仲  
殷兄以貧窘乏用急欲賣官濠下之空屋地我時雖幼  
獨不肯出筆一人不出筆則買者不敢承交二叔見逼  
不已遂以東門所共分屋地并塘皆貼還我然後我與  
契上畫字故當時劉永壽買契上價錢皆二叔一兄得  
之我獨不得者蓋以其東門所共分屋土并塘與我相  
換易也然我隨母在外未曾回東門住仲基兄在盤古  
山住與蕭壯父子致閑問我借予超叔分與我之屋居

住子超叔文約一紙是親筆今見叔在仲基兄處蓋因當甲首而吾適不在家先母用此約於仲基兄抵當鈔五百文買鐵索納官吾兄弟相友愛無間後來亦不曾取贖此約賓畿具知此事從前來歷如此雖後來官中抄劄亦只是空地一間見有文冊可考也吾之此言一語一字皆實天地祖宗鑒臨在上不可誣也而吾兄輒為此言豈以吾為全無知耶豈真以吾為妄爭耶吾今所以說與汝者以明吾之受分於祖父者來歷明白如

此實非妄爭也然吾兄既如此言汝便讓之更不可思  
想去東門居住城外固非可久住可從容別為謀也鄉  
邑近年故家子孫皆以分爭產業交惡此吾所甚薄者  
汝宜戒之汝宜戒之兄弟相讓自是士君子當為之事  
汝不可便取疎外閒暇常常去伯伯處聽教訓也匆匆  
只此

自汝兄弟起程後吾惓惓在念昨日得過濟寧之書知  
一行皆安可喜然須到家後有書來始得放心也此間

自汝去後闔家皆感冒風熱證汝毋及紂林特重今皆  
嚮安惟紂未甚解耳吾亦昨日始出視事家中所急者  
南京未有人為糶俸米闕來早晚缺用也汝經年在外  
到家便須親去各處展省先墓當培土處便培土不可  
忽畧過凡家中一切事務與榮兄從長計較行須聽他  
說必然不差俸米必須於官倉下交決不可於人家對  
過恐被人作侮後悔無及去關米時尤須與人恭謹謙  
和居家最緊要者愛惜家人務令衣食充足若有不曉

事處緩緩教之切不可輕易辱慢此是朝廷所賜者二  
童更須愛惜此意亦須說與新婦令共愛惜也汝丈人  
處近有一歐陽生來能言此老在彼家業稍厚恐未便  
得起身當是八九月可到家然亦未知的實如何也今  
附梁太婆祭文歸可請人寫過靈前焚之須備猪羊庶  
品之儀去祭餘不一一也

近有兩書附劉本靜及公差辦事官回茲因子通行再  
附此吾此中長幼皆安亦聞汝輩平安抵家又聞鄉里

今歲頗收米穀價平小民不至艱苦甚喜甚喜但聞導  
子保母歸病遂已安否切須照管之導貪趨讀書可愛  
林稟受北方之氣擺掉不馴然有時發志向前記書認  
字亦自可人吾以是公務之暇閉門却掃雖老病而對  
此亦足自遣第恨汝母去世早平生劬勞而不見其可  
翫時也汝理家之外宜閉門讀書寫字久而有得厥有  
真樂凡疑義未通處求教叔車叔莊及常親近郭彥鉉  
先生聽教益一切流俗輕薄人可遠絕也十分用意照

管一應文籍書畫吾愛之甚篤致之甚艱汝輩肯學將  
來大得其用也俸米分送親戚已了未買屋地所貨物  
皆償否劉皮匠所占先業曾經理否急欲知之可報來  
孟嘉何時啓行使中亦報來看覲菊英所帶回人口老  
少並須溫存撫恤常令飽暖有不是處但容忍好好教  
之切不可打罵原家中婢僕待之亦然向所寫陶淵明  
遺子之書常貼置靜坐之所遇心中不平時舉目一觀  
忿戾之氣自消矣吾兒卓立務為好人君子將來二弟

皆視汝為法則也勉之勉之公門中絕跡不可行公門  
中人絕影不可交皆吾所甚惡者須猛覺悟毋為人甘  
言謗計所誘也但絕此一念便有向上之路矣汝勉之  
勉之

近得伯伯及康甥及汝寄來書知平安到家并家下人  
口皆安慰喜慰喜吾此間長幼亦頗安傳聞鄉里夏間  
不雨甚為小民憂之今果如何若鄉間果天旱處則田  
租量宜取之不可刻畫求盡得也吾兒凡事寬厚存心

為好帶回家人加意愛惜母縱容他人欺壓之也出入  
慎重勿與慾人為侶則自然一日一日長進矣鍾孝先  
在此所借者已如數見還矣更不可問取也俸米關支  
如何曾送親戚否劄人處屋地已取得否移居如何若  
移居後東城外是誰看守所帶田物還人皆發落否康  
甥行期如何可一一報來告知下落也一應書籍文字  
及諸妹衣服都好生照管今日得昇姪清河縣書度後  
月初旬汝母及弟妹皆到家一切事須悉依吾所寫與

汝者行之勿違吾與綸道皆安但申子犯酒昂子皆病而昂子尤重今早晚衣服飲食全無得力人昇姪若能來則附搭一的當人來若不能來則不可強也賓畿與劉子望在此皆安但其事未果決未有歸期爾其家事可為照管也近日有折俸鈔五萬貫於鄉里商稅課程內支文書恐六月方到必在府中關汝去關時必謙和盡禮得支後須好生收貯一貫一百不可妄用吾此間有用也

吾病體入夏來畧安但聰明益衰行步拜俯甚費力此亦年紀當然不足怪也而早晚得賓畿在此相慰藉差可自遣但汝母弟數口歸迨今無信不知何時到家以此掛心耳又聞交婦及康佳皆逃胸中甚增磊塊吾平日教汝待減獲恕處鄉里和不與小人相接汝早從吾言不致此失未審比來有蹤跡消息否有無宜寄書報來吾在此每遇一鄉里人來輒問索家書蓋出于愛子之心近張時薦王善學來汝皆無信是汝不能體父心

也甚孤吾望汝毋回時所分付諸事悉遵依行之或吾  
所言有未審處可質之紀善親家為斟酌裁處也龍人  
及曾胡記田土等物一毫不可干預悉須還之陳冰土  
亦須還之今後切戒此等事不可為也居家無事時閉  
戶讀書寫字出城外督耕一切下賤小人與之遠絕聞  
叔車在隣近館可頻去親近教益自然漸習為本分人  
矣切要所望於吾兒者立心忠厚戒刻薄重義輕利多  
積陰德庶幾增長已福以及兒女耳吾之官祿不可恃

也人之可恃者惟積善必有報吾兒勉之目前紛紛可  
鑒已栗年二姪永齡可喜皆考過然自今已後須猛力  
進學方得不然此未可憑恃也年居鄉無外事甚好但  
勉其節飲勤學將駿駿向上誰能禦之考本分嗜學更  
難得先師之後所望二姪宜語之使卓立也江陰父子  
放肆不顧身家可為之憂然又不喜人言近常州來者  
言之極詳使人聳然然吾無如之何也可嘆可嘆嚴士  
正在彼甚得士君子之譽憲姪亦可喜孟京之後亦不

寂寞矣林須遣之讀書不可荒廢有病頻請鄒孟義看  
脉也賓畿公餘皆極口稱譽吾兒勤力起家然非老父  
所喜蓋人生衣食之計只可隨時况汝隻力無助尤切  
吾心自今凡百放緩以休息已身惟有脩德務善不可  
緩也勉之勉之組娘安好如何梁娟館何處康甥館否  
有便人皆附報來昇姪行止何似亦望報此間近攜數  
小歸分付闔家大小須愛惜擡舉不可作踐要皆如自  
兒女待之

近日始得汝五月末書知闔家安獨福住病不起人死  
生雖有命但此僅不能無遺憾者平時無人照管食冷  
卧濕風雨寒暑縱恣自便至於有病畧不顧問及其病  
劇方始求醫雖有扁鵲豈能効力今後當切以為戒家  
人男子婦人皆須加意照管但有疾病便早與醫療不  
可因循病深則難治要知人力難得不可輕易看也此  
事亦須內外皆用心方得更有切語爾者不可輒聽小  
輩讒言加怒于人蓋小人多借汝以報其私讐不可不

察凡事須是親見的實方可出言偏聽甚是害事不可不慮每事聽教丈人決不誤汝大抵為人省事是安樂第一法守已須是清廉處人須是謙和結友須求輔德臨財須思合義吾兒勉之房屋未完想今木植難得更緩一二年作數間土塹居於前儘好汝隻身無助無苦役心力也今後更不須買田隨時遇遣也非獨省目前爭競亦省後來之累也更汝目下二三年皆星運不齊如意防慎吾三二日間有遠行匆匆附此

近聞江西大水未審吉安如何甚用憂之四方水旱之事常切吾思慮何況鄉里而吾兒書來凡鄉中雨暘豐儉如何未嘗一字及之深不滿人意自今作書必須及之伯伯生穀只取三分之利此最可爲法人蒙實惠必不忍負之既可濟人亦可長已之福汝當效之也本之書來切怒叔濟爲無禮於其嫂與姪吾意必無此事然已附書劉雷啓問之矣若果無之則當以實情自白以杜讒譖之口以全叔姪之恩吾兒可以此書示之吾兒

家居凡百處善循理不可用意於義分之外鄉鄰有過  
一切容之勿與計較凡災傷之處田租當體恤寬免慎  
母過刻也聞已有梨板甚好後尋能書者謄錄寄回也  
在家閒暇勤習黃庭經或樂毅論專學一帖久則自然  
精熟熟之後又學一帖可也前書所囑付者皆遵依行  
之此不複出

公差人行數數附書回必皆到前書所囑者今不複贅  
但遵依行之却一一報來叔車來切切言二事其一謂

叔濟欲就教職吾今亦不復阻抑之但吉安廬陵皆不可慮惹是非龍泉僻靜可為新淦亦或可聽自主張吾不能助力也其一謂蔣重欲來可聽其來但要其家父母情愿吾家不可强之來亦不可沮其不來蓋吾老矣亦欲了此一事也但來時其家得一老成能事伴當送來途中好生照管足矣搭船亦須得誠確可付託之人方可蓋路遠年小恐性情未善也禮物不須將一毫來慮途中惹事況吾分毫無受也其家亦不必親屬有名

分者送來吾此間儒素凡事隨時不能一一如鄉俗具禮也來時只七八月可行九月啓行即不免途中守凍守凍甚艱難也此事可與叔莊孟勤言之今寄治心痛膏藥四箇回如疾發時先以生薑擦痛處却貼上膏藥即用雙手炙熱於膏藥上熨七八十下以得汗為度外有六箇分與三女遣人送去也蕭親家來求墓表後有便寄去劉鈞能改過否西安無謀與人撐船去年八月在臨清已被打人打死吾孟省兄竟絕祀矣可傷可傷人

之不學無謀者可以鑒也家中一切事依前書行

曾蒙啓帶書來後再不曾得書想家中長幼皆安此間  
闔家亦平善無事所寄宜春謾稿復見心詩錄本胡學  
士書簡田糧冊子皆到今後有的確便人還望寄宜春  
謾稿親筆本及胡學士親筆詩盡數封識將來要裝表  
卷冊專望專望弼姪及叔車叔景在此皆安但三人皆  
中會試副榜當除教官不免俱抑鬱耳然此皆有命渠  
固不違也今殿試曹興史作狀元所謂平步上青霄吾

鄉素有名譽者皆立其下風矣今年會試吾邑中者二人曾翬第二蕭聰第四十六尤出意外之料殊可笑也中副榜者任衡梁黎楊繼蕭纘劉尚錫王粲楊弼孫裕蕭儀袁和曾良龍文王鏞蕭纘蕭雋歐陽凱曾衡總十七人皆將除教職又取副榜再試中二十四人皆冠帶於國子監讀書吾邑預者三人龍文梁黎袁和已送入監矣羅崇本除刑部主事蒙啓除行人皆在北京德遵病未愈德遜必已啓行矣

近伯頃回有家書及附三兩與陳中令往興國啟外祖  
母殯歸葬此是吾平生所未了一大事吾兒宜用力贊  
助陳中了之以成吾之志再不可延緩祠堂汝自相度  
斟酌若月日得利早完為好前書令助叔莊處喪事不  
可因循寺下不免冬年時行祭禮劉鈞如未作生貟則  
已之若渠能教鄉館自求師授經足以勉進成材作生  
貟非不可但是近年學校之風頽壞後生習成蕩性十  
有七人無成效也吾兒家居督耕之外閉門讀書討究

義理考古人嘉言善行遵而行之無限清樂切湏交處  
好人各處祖墳歲時須躬親遍歷展省不可遣人代去  
東門伯伯年老早晚閒暇常常去聽教訓以知往事蓋  
吾宗惟此老能知前事也看管孫子父母須自用心不  
可全付之下人且未可議婚待十歲後未遲議婚湏稟  
命老父不可專擅一應家中書籍文字並須常常較過  
母致損壞此間五六月家中大小多病喪一老使喚婦  
人昇姪所生子甚可人周歲後一病歷數醫不效而死

甚可惜也所索文字附的當人來為望昇在南京至今  
未回蓋柴遲鈍發賣未得也曾永齡至今未到可唉報  
其家知之

吾近得泄疾四晝夜五十行危甚幸不死然亦頓衰憊  
不復可支持矣所望吾兒者只有一事但痛絕小人之  
交吾兒即可爲君子矣吾平生所不足汝者亦只此事  
常磊塊于吾心胷間汝體吾愛子之心勉之勉之即吾  
旦夕死不相見亦只有此事奉囑也勉之勉之

近日戶部公差進士行曾有書必到因康啓常行再附  
此前書所索文字作急附的當人來非其人不可妄寄  
有便多寄豆豉來戶部俸鈔勘合關支後附的當人來  
寄汝母畫像來汝母墳前享堂又累鄉里雖有朝命吾  
甚愧之自今切戒切戒曾永齡至今未至聞其同載之  
人緣途淹延皆不欲來也紕病如何好生照管之父母  
甚念之也此中長幼皆安家中看管孫子為父母者當  
留意不可全委以下人恐將來壞其德性也一應書籍

文字法帖畫卷好生收貯時常晒晾纖毫不可損壞此  
是老父平生費盡心力所致以為傳家之寶者汝須用  
心寶愛稍有損壞即不得為孝子勉之勉之昨蒙聖恩  
賜御製詩一軸後有的確便亦寄回伯伯書來索沉香  
鳥附後即寄回但恐太熱老人須斟酌用也近日王典  
仗乃子行便曾附書宜春謾稿原本所遺落者望搜尋  
盡數寄來欲裝背成卷以傳後切望切望更望檢尋漁  
灌詩集二冊及錄五雲方尺一冊謹固包封寄來此是

知事伯親筆又有鄭公送知事伯序一篇却是司倉伯  
親筆亦要寄來裝表為家傳之寶勿悞其餘書籍圖畫  
法帖及一應文字雖片紙皆須寶愛不可損壞遺失吾  
得之甚重汝守之不可輕也不可輕易借人借非其人  
未有不損壞失落也陳孟潔不能保守先世文字君子  
責其不孝深可戒也葉林懶學吾去年猶時督切之今  
歲老疾益增精神益減戴星而出戴星而歸歸則困臥  
不復能舉口一問之蓋亦付之無可奈何而已大抵老

身非能久于人世者吾兒宜處善發遣將重來悉依前  
書所云也昨日有一書附刑部辦事官回蓋龍叔聚到  
此方三日家中事頗悉所重者分付一家長幼用心照  
管長孫此宗祀所託也慎之慎之詳細悉具前書汝夫  
婦凡百聽受丈人丈母訓誨不可自是也康仲述田不  
用之甚是但不必恆人凡事須習度量也契字待有的  
確人寄回屋後之井果然如何湏討究分曉寫書報來  
吾兒湏謙和處鄉里凡事忍耐不可使氣性但憑道理

為上策也。愛惜家人加意待小高之母阮麻及福住有疾請醫治之造居隨宜可也不可學鄉里人作事大過也。近蒙聖恩賜御製詩文數軸今以御製招隱詩一軸謹密包封用匣裝盛寄回可糊飾中廳張懸於正中懸處須高以防觀者之不謹張懸之時湏用寄回紅紗籠蓋以避蚊蠅之點汚於下湏安一香桌寘香爐花瓶以示不敢亵慢遇天氣清明無風不寒不熱之日即張挂若遇陰晦風雨大寒大熱或梅月天氣則謹密包收于

乾燥處當中收貯更不可於正廳中間設坐席縱是老  
長亦只于兩邊設坐席示所尊也所必當張示者蓋欲  
使遠方下邑之人皆知聖明之心惓惓于訪求實德真  
才與共圖治道也所索祖父守玄宜春謾稿墨迹一冊  
族譜胡學士詩文書簡盡數將來勿遺落片紙衆克俊  
處取復見心詩並要寄的確人來俸鈔關子寄勘合來  
鄉人年小誠實者求覓一二人寄來林仔有病遣來此  
醫治家中用心照管孫子從容善教道之不可縱其習

薄劣此第一事用心愛護書籍文字及一應法帖圖畫  
此是老父傳家之寶不可輕易借人也待家人及佃戶  
須寬而有恩不可自損陰德切要切要寄汝母畫像來  
近時得御製詩文未寄回者皆錄副本示汝觀之可珍  
襲也曾永齡至今未到羅昇亦未回聞薪價甚賤無人  
問及也二孫皆幼不許輒與人議婚此鄉里薄惡之俗  
吾家更緩數年無妨

我與伯伯六十九年兄弟伯伯長我十六歲我幼時是

他捧抱我稍長是他教認字讀書後來多般得他氣力  
最後廢盡氣力為我婚娶我在南京中風病時他念我  
左右無親人中心懸懸淚眼不乾此情此德吾夢寐間  
不忘吾兄弟數年來皆老皆耄切欲一相見連床數夕  
相與言所欲言以快暮年之願但我身受國恩不敢言  
私今伯伯已矣哀慟奈何痛苦奈何想吾兄思我不見  
死未必瞑目矣吾雖苟生亦復何心故聞訃以來痛心  
如割涕淚為枯情自不能已也想伯伯平日於汝之情

亦厚每聞汝行事有過當處便肯直言教戒此皆是愛汝為善人君子也繼今誰肯言汝過失子路大賢喜聞自己過失所以令名無窮今人有過失不喜聞規戒之言所以終陷為小人而災害及之矣吾兒自今宜勉力為善有人進善言者便虛心聽從切不可拒善言不納也伯伯處喪葬之事一力向前贊助非比他親戚也吾此間近亦艱難無物寄回助之可以俸米十担助之今寄祭文回汝可備祭物代行禮送葬及歲莫汝自具禮

致祭以盡子姪之道

仰高回已有家書數日前附書與汝及伯伯祭文墓志  
書信與諸姪皆在禮部朱員外帶去後又附書與汝在  
曾狀元庸安帶來前書所發落者今不再寫今所望者  
便發落蔣重來不必將禮物來亦不必其家親屬送來  
只令其家一老僕老成重厚者送來須是八月便起程  
九月來則北河有冰凍之患守凍十分艱難此事只與  
孟勤言之匆匆只此

昨日有書及新刻曾祖墓碑祠堂記各數幅在樂善郎  
中處回今寄碑石三片凡四刻詞記可尋石之粗而稍  
厚者作方趺安頓祠堂中偏側向隅處望石則如先母  
陳夫人墓上之制用長石四條而嵌置之然湏論方向  
擇穩利月日乃可為勿輕率也有恩賜玻瓈條環一副  
併條就寄與汝用此是上賜宜敬重珍襲之也吾兒憫  
念叔萬而經紀其妻喪又存恤其遺孤甚好甚好老父  
聞之喜而不寐亦湏常囑新婦用心教養若新婦能盡

心照管則下之人不敢輕忽欺侮之矣勉之勉之其子亦聞性資勝清亦旦暮善誘之向學為好海桑先生大儒君子必將有後有後必將在此孫吾兒勉之然亦湏常飭勵清戒酒向學為好人亦湏與仲兼說宜夾輔之向道理庶無辱婦翁也賓畿惠椒已領感厚感厚吾兒可面謝之亦湏叔姪常相親相助為善也吾與抑庵德遵欲祭益昭備祭之資及祭文皆已附在崇本處至期物具則希積與汝及陳之姪三人者代去行禮碑石到

家汝湏備禮親往謝之蓋遠道寄託甚難也其餘墓前  
望石待用紙寫寄回汝自刻也拜意伯母說與東門諸  
兄篤孝養惇友恭也

示稷林二子書

叔粲親家叔車回皆有家書及附物慶住余侍講回雖  
無書有分付言語近日錦衣衛舍人操勉行亦多寄書  
所分付汝已詳悉可一一遵行不可違悞吾家自蕭薦  
之來後絕無書朱仲和乃子來到臨清遭刦盜各家所

寄書信盡失之矣吾遣慶住回專搬取汝母及林汝若  
祠堂之地已復則可親自送母與弟來如未便復則令  
遠壽送來須尋一居宅與楊奐令其母子得所不可以  
失宗親之義此非他人之比也使之得安穩歡喜去即  
汝之賢矣一切之事皆要依吾前信行不可違悞不可  
違悞汝母來帶吾青紵絲繡雲鶴圓領來帶方壺畫來  
若祠堂已復未得蓋造則汝且來此面發落汝庶得穩  
當今有一書寄伯伯專說祠堂事汝可親送去汝若來

時家中一應事務請賓畿叔提督整理

示葉子書五首

任能讓及武都督家人至得汝信自後更未得吾病更無減退七月末因檢尋賜印及米二勅不見詢知又為不孝子盜歸以致倚勢在鄉生事造禍因此情懷懊惱氣病大作苦痛數日一痛之甚即與死為隣此皆汝與昇從吏不孝子所為汝三人之罪惟均可誅可誅來時即尋出此二勅帶來或先寄孟嘉來勿悞勿悞更將來

時湏謹固包護密封不許纖毫損壞但略有損壞汝皆當死在家湏逐一一看過一應詰勅及凡有御寶文字並要點對仔細寫數報來切要切要其餘書冊文字法帖圖書及御賜物件俱要具數報來如違父言俱是不孝吾鬱氣忍痛書此數字汝審之

孟嘉九月一日在廣已去世可即令輶同遵來此取回家小勿悞勿悞去後廣中取喪今別有信二封在劉良手回與爾叔姪可知之

所發落回家事一一着緊為之不可遲緩不可遲緩但是互爭不明田土等業盡數還人遠鄉田土及近鄉燒瘠無收之田盡數出戶還人皆要告官明白彼此皆有下帖執照庶免後來吾家之累在戶只可收三四十石糧不可過多我死後門戶差役汝叔姪大難應當不可不慮羅崇本族內田土山塘盡數還以原物切不可聽人說誘對換聞視原坑用其地土起莊屋亦拆下屋料退土還之必須從我之言乃免後患他人家有互爭不

明來說者必湏皆如此行勿違勿違只要稅糧出戶明白至囑至囑青林寺前紅門作急便拆作急與父母造合葬之地此事尤不可緩急望報來說與呈母子各處莊下有穀不問多少盡數裝回遲恐不可得矣遣人去時湏和氣相與切不可爭鬧又惹事也餘事並依行時發落不許違悞致意賓畿叔之貞之跋之序之所凡事皆望用心佐輔必要停當至囑至囑病中不能一一作書萬望畱意也

龍士熙及王貟外士華行皆曾寄書歸自袁宗範來得汝書後再未得知不知到家今已幾日所已幹辦幾事完備有便望一一報來切不可依稀落落虛度日月切囑羅大庸一族之中升田斗地皆湏還其原主此間已批契字盡還之矣昨聞崇本有書與其家令他勿受此語切不可信想他前者招五六十人同來告狀此其惡意豈是甘心不受田者如今不管他家受與不受只是盡數退還之縱其不受我亦退還之聽為閭田庶免後來

之患切不可聽無知之人謬說別撥田土與之易換以  
惹後患視原坑莊屋亦拆棄還之切囑切囑其他遠鄉  
但係賤價買得及受人投送互爭不明之田盡數名原  
主還之父母所買者皆用實價不在此例却湏告縣推  
割分明不可苟且依阿貽患于後務要兩月之間盡皆  
了落不可延緩老身自聞不孝子竊璽書回後病益加  
重氣體疼痛晝夜不停而夜更重決非久于人世者前  
分付作墳不審的用何處切望早定作意為之亦浼告

諸兄從史如法堅固不可草草也餘事俱拜意賓畿叔之貞之夔之序之所四兄從史早成為望前月二十四汝室中生二孫一男一女并示汝知之將去蘭亭是最高者傳家至寶也切不可污損慎重慎重

吾病雖晝夜服藥但中懷懊惱證候日有增無減今即死已不夭矣但憾稷不肖不受教訓多攬不毛之地在戶將來為吾子孫之累故專遣汝叔姪歸務要減退十七八庶免後累切不可惑于他人好利之言而不從

吾言以自取不靖也蕭氏既有子說與大新婦用心好  
生看養更湏好待其母更不可家中不和稷急乏盤費  
若非父母在此已窘迫無措可遇的確便速寄來接應  
蓮在家每日要着實幹事見功效切不可依稀苟且虛  
度前後所附書回皆要帶來看過不可一字遺失凡前  
書所發落者老病之人更不再寫但盡心作力為之畫  
夜不可怠忽平日所輔稷為非者一跡不許登吾門切  
記切記

示姪孫挺書八首

屢得汝書知在官平安甚慰老懷吾在此衰老日加蓋  
今年七十有四理當然也春夏間必乞身歸蓋目前實  
錄未完不敢言私也汝在官有暇不可棄書冊一切公  
私事務皆湏依道理行分毫非義之利不可苟取務學  
慎行一日長進一日方好不可與輕薄不着實人相交  
常常點檢自己但有過失即改之有暇與之夔往來叔  
姪互相規益更好鄉里動靜有所聞數寫書寄來吳朱

皆當今賢人君子汝幸在侍下朝夕觀其所行聽其所言倣而行之自有長益勉之勉之致意張御史徃年見所和唐律曾有一詩託楊顥將去不知顥不曾達近日於他處得之今寄去汝可為達也外有清溪家譜寄之夔書一封在內汝可自送去汝父墓誌二月凍解寄便舟持來不誤汝也正月初三日

近有一書託祭酒先生帶來與汝今因秦御史行便再附此楮所望汝者卓立為君子為仁人勿墮於流俗庶

幾不忝門戶大抵持身為本身正則所行正擇交為要  
交善則所處善閒暇即讀書進學以古人為師無負老人  
所望之夔會間亦道老人此意也此間半年多不得  
鄉問每用懸心南京必常有聞不惜頻附報來三月一  
日夜燈下寫

平日教爾修己處人以免罪戾今聞來往人之言汝為  
同僚所欺侮此必是汝之誠意未至蓋未有至誠而不能  
感人者也宋張橫渠先生教學者不幸與匪人同處

但常自家點檢不令已身有過大抵士君子豈可致自己有過汝切戒之切戒之吾亦聞此人平日所為只是汝與之同僚當曲意包容一毫不可與校他山之石可以攻玉汝積習之久自可成德亦與之夔道吾此意吾今所寄之夔書可令附歸與其兄弟觀之使改行也汝亦頻頻寄書汝兄弟令循禮法善處鄉里也正月六日平日教汝分毫皆湏守禮法庶免罪戾汝在衙門內豈可問人索官紙寫私信雖是半張亦係官物但舉發即

有罪今後切戒毋蹈前非吾詩汝可照依今改去者自  
錄一本整齊小楷仔細對過寄來發回與稷汝不可於  
南京刊刻切不可不可昨晚偶有所聞故再附此致惓  
切之囑

蒙啓來得汝書知在教學甚喜此是大人長者與進汝  
汝須加意不可怠忽大抵教學之法須小心導誘不可  
急躁切記切記雖在教學然不可荒廢職事更不接納  
鄉邑小人以壞名節穢之不肖具之夔書中汝可索觀

自警也汝父墓銘後寄來必不悞也

吳都相公書來言汝誠實朱都相公書來亦言汝能謹用慰老懷然汝尤須加謹以不負大人君子之許與以副吾望吾在此凡物不乏用汝數寄物來甚乖吾意欲悉遣還則道遠累人不便故强存之然終未嘗用也和鼎將來布今發回汝自今宜戒也更與學錄具道此意宜共戒也汝父墓表就附和鼎歸汝可錄一本寄二伯及諸兄弟觀也吾家子孫惟當謹守清白之傳不可以

辱先世吾為稷累日夜懊惱奈何奈何學錄處匆匆不曾寫書汝以此示之共知吾意也此間長幼皆平安如常五月望夜燈下書

汝錄去謬詩初意只得汝閑暇自寫何以煩勞他人且達堂上之聽皆由汝多事不靜也且汝一檢校末職亦敢私用監生是汝僭分憲臺是綱紀之司末職尤須戒謹庶免譏怒自今戒之所錄來者今畧改正再寄去不當在衙門為之亦不可令達官知之惹譏謗也為此切

湏隱約不可彰露也一應紙筆等費用可於兵部徐大人支俸已有書達徐公矣付挺孫此書汝可自觀不可示人

東里老人書示姪之夔姪孫挺吾近日為不肖子姪作過見累憂惱不已而疾病日增此况汝曹可想而知也所望汝叔姪持身謹行動師古人而毋貽人譏謂吾家子弟皆不淑也勉之勉之心緒不好亦無暇及餘事但南京有聞鄉里事不惜頻頻詳悉報來

寄昇娃林子

吾此月初九日至淮安今日午必到儀真途中一行長  
幼貴賤皆安家中俱不必慮到南京必換舟從安慶南  
康而歸長江大湖雖多南風幸今春水未漲也吾所過  
未嘗登岸入城雖有聞知來見者未嘗有所受之以此  
自家胸次泰然汝兄弟各湏謹慎事事依我所發落行  
不可遺墮不可改易母親有病請蔣先生看療不可捱  
過吾過東昌因食片梨泄瀉六七日服藥始解大抵有

病之人不可不絕生冷之物慎之慎之時常點檢大門  
中門之內不許諸皂傍留生人更約西邊家人不許引  
惹人來往恐為不利餘事悉依前命而行匆匆只此牘  
呈長壽勤用心讀書不可墮虛度日月也又批閏二月  
十一日四更過揚州揚子橋燈下寫

途中並不遇鄉里來者故不知吾家消息併示汝知之



東里續集卷五十二

欽定四庫全書

集部

東里續集卷五十三

四

詳校官檢討臣羅國俊

中書臣劉源溥覆勘

總校官進士臣楊懋珩

校對官中書臣范鳌

校對官庶吉士臣毛鳳儀

謄錄監生臣徐秉文

謄錄貢生臣戈廷模

欽定四庫全書

東里續集卷五十三

明 楊士奇 撰

家訓

訓昇姪

德安公平生力學清脩不讓古人昇為長孫豈可不力  
以承繼之能自力則為賢孫不能自力則辱爾祖矣  
豈可不勉

囑付姪昇緣路事宜

二十事

一舟中常掩閉窓門婦人女子不得窺覲外面

一林只在官窓深窓二處不許於船舷坐立船行更不可過窓使風之際尤須謹慎

一泊船之時婦女幼穉皆須寧靜不可喧笑啼號一炊爨只令劉林生阮徵在外整理孫兒夫容皆不許出

一舟中斷絕煎炒燒炙緊要緊要窓中火爐謹慎謹

慎

一經過遇相識不可停留不可停留

一晚泊須覓安穩處切要切要若雖未晚而遇有安  
穩處可泊即泊不可貪程

一遇見雲氣風色不便便須早尋要泊處不可因循  
致臨事窘急

一遇夜不可貪程

一灣泊之際須察隣船人情不可忽略

一泊船夜睡不可沉鼾須相輪警省

一遇有薪米賣處便須預辦不可直待空乏

一遇作神福酒肉須及駕船之人自家寧可不用

一沿途討添撥軍夫須十分和氣不可使官府生事

惹累至囑至囑

一船行之際或與人擠拶須兩相避讓須戒飭駕船之人不許生事

一遇口岸去處不可淹滯若過南京亦只住三日不可久停作急啓行

一到南京於歐陽主事處討俸米十七石還百鍊有  
米則討十石回用米少則隨討多少不可執一耀  
得有物亦討些用但不過十數

一途中思未足物件可於南京買然不可久住  
一廣哲處有夾漈通志一部可打點明白完備用夾  
板帶去却寫信報知

一線路凡過一處便點檢收拾起船勘合至囑至囑  
一舟中須嚴切鈴束諸小不可姑息

一與百鍊說不可過建安站船歇防人情不測

訓旅鷄良稷八事

吾家自高曾以下子孫皆至親須惇睦患難相助過失相規如有不受規益者衆共責之卑者衆共笞之必盡公道乃可使服今條列數事以示汝兄弟遵守

一須訪求有德有學之人為師以教子姪擇其資質  
穎悟者教之以治經次者教之讀書講解習詩文

雜學必皆教之正心脩身事親處人之道為本  
一祀先事親已有定規不許怠慢陷於不孝

一凡公事不許干預苟利以辱家門

一閭常時須勤勵子姪使貴義賤利務善循理親近  
正人勿交俗輩

一子姪有善行好學者衆共禮之重之若有分外不  
律不受訓誡者稷會諸兄弟數其罪而笞之不可  
容恕如又不悛明告於官請治以不孝之罪

一教子姪須要處友待下皆寬厚少飲酒蓋貪飲者  
未有不亂性背理處人之法謙虛忍氣無不得吉  
一旅鶴良稷須同一心有狼戾自異者衆共攻之攻  
之不改者絕之不為兄弟

一兄弟本同一氣不可聽婦言以傷至親之情

訓姪與子

吾今啟行甚急蓋君命不敢稽延也吾今之歸但祖墓  
一事是務然匆匆力不能皆親到龍泉萬安二處已令

良同子佩益智三姪同展謁早禾市等處汝鵠同弟稷  
往展省在樂氏住居傍近展省後作書報來亦令良姪  
三人同寫書報二處先瑩安否來但有未安處須便整  
理有侵犯者悉令改恃頑不肖改者須訴於官切不可  
坐視不理自陷於不孝切囑切囑先兄思貽先生存日  
於四十三都新塘買田五石以為子孫歲時展先墓之  
用此出吾兄誠孝之心為永遠之資五房子孫當永篤  
敬承不可有隸以自陷於不孝勉之勉之凡歲時展墓

之祭只於高祖考妣曾祖考妣先祖考妣先考妣四代  
祭物只薦魚肉米麯常須依期每展墓時必須於塋域  
四傍巡歷周覽恐有小人侵犯切勿怠惰近墳雜茆草  
各房輪流采斫家用遠墳雜茆草就明出手帖與看墳  
人采用若子孫不守本分擅伐墳塋樹木者以不孝論  
罪若枝葉深密慮藏蛇虎者各房同眼剪減而均分之  
皆永為定例付諸姪及稷同觀

訓東城諸姪十三事

昨五月二十七日晚得鵠三月十八日所報凶問驚慟  
哀苦屢絕而蘇雖吾兄高年盛福子孫滿前無復遺憾  
但我六十九年兄弟既老不復得一見以足暮年之願  
而今已矣吾負吾兄哀當奈何臨終時曾囑付後事否  
聞往年已豫定墓地在何處曾整理墳否葬期  
何時可一一報來吾哀痛之餘思汝兄弟當行之事因  
便寄示可遵依行之此亦大概耳餘可推類而行也凡  
事依道理行勉之勉之

一父沒母老兄弟最湏和睦尊卑長幼各安其分長者發言行事或有過當處則少者湏忍少者或有過當處則長者湏忍但忍過一事兩事兩不留意自然和睦切不可輒聽妻子之言以傷同氣之情一切家事兄弟平心易氣商議停當而行不可競分毫之利以傷大義汝兄弟和睦則老母亦可以稍慰暮年矣

一葬地已定則好若或未定則只於祖墳傍近擇高

爽乾燥不生水蟻之處即是好地不必論富貴吉  
凶大抵祖孫父子本同一氣死者安即生者安自  
然之理也富貴吉凶陋俗之論大道理說不通也  
更勿用僧道齋醮虛費

一祖宗所遺一應碑銘行述詩文藁草片紙隻字及  
家乘譜牒之類並委鵠收掌愛護不許損壞但略  
有損壞即是不孝蓋此係吾家傳世之寶子孫所  
當謹守為是鶴繼伯威兄之後係宗子房下故當

掌之

一父所遺下田土契字及生借文約若父在時未有  
發落則只於汝老母處收貯待弼回時兄弟同稟  
老母處分切不可私異有為以啟爭競取譏鄉里  
貽辱門戶

一家中諸事須早晚令稷來協助出力如稷處有事  
鶉良亦湏去協助出力兩處兄弟務要同心不可  
分彼此內相和則外不相侮所謂籬固犬不入也

切戒不與輕薄人交處

一父沒凡一應租穀生穀湏放寬取索不可刻覈恐惹怨生事蓋今無父人輕汝矣宜慎之慎之

一各房子孫宜嚴督之讀書不可荒廢切要切要湏尋一片好石刻墓銘請叔莊或希稷依樣書石而令工人深刻之藏於墓中却打一本寄來更多打數本與各房子姪

一每年汝兄弟及稷都要依時同去各處祖墳掛紙

不可一墳不到不可憚遠不行

一之宜姪所置書籍甚艱難於今不易得矣可專付  
魚孫掌管愛護其母亦須用心同管庶免遺落

一奕魚無父為叔者須矜念教訓之凡事與之作主  
張不可坐視也

一凡親戚中尊長惟止齋先生一人每事必當求教  
而行必得穩當

一各處古親戚皆湏如父在時照管之不可踈絕

與東城諸姪姪孫

說與東門諸姪及姪孫務要各守本分習為好人不許  
違理犯法稷見有樣不可不謹兄弟子姪本同一  
氣務要相親和睦不可因小利失大義俗言家不  
和則隣里欺謹之謹之

各房皆教子孫讀書為儒者然後可以擇持門戶不失  
祖業此是第一件事勉之勉之

凡係宗族務相親睦有患難相恤有過失相規戒凡是

先世古親湏相往來不可冷淡大抵凡事重義不可重利

說與奕昇羊奴仔元是一名軍可遣回本都不可占留在家後來事發隱藏者同罪悔將不及况此僕近年來結羣為惡其勢橫甚若今不遣去將來必為汝叔姪兄弟之累切記老人之言不可不聽

訓康甥孟嘉十六事

康甥孟嘉從予兩京十有餘年今以薦得官將之廣西

予既哀毀壁於九原又念韓伯之萬里分別之際情懷甚惡兼糜公務鮮有閑暇欲賦數語為贈未能謾就燈下寫切於今之從政者數事遺之大抵持已愛人事君之本其至道精義具在簡編進而求之所益大矣孟嘉勉之

一第一件常常點檢自己身心要在道理上出一言行一事背了道理便不得為君子若出於一時失錯便猛思改過終身痛以為戒方得

一大凡修身慎行皆須自己着實下工夫不可毫髮  
放過放過便非着實今人無自着實工夫只是修  
飾外面要別人道好而不知盡為有識者所窺遂  
指為小人此是立身根本

一閑暇勤讀書考古人嘉言善行體而行之常親近  
正人虛心以請益焉然人之邪正未易辨識大抵  
行止端莊語言合道言不及利便可親近若好讒  
人諛人議論不正諂媚取容言不遺利此小人也

湏遠之遠之

一仕宦當以誠心愛人為本愛人者事君之實程明  
道先生縣座右嘗書視民如傷四字古大賢尚如  
此何況今新進小生豈可不勉大抵人情好惡彼  
此不異推己行之無或不當若待蠻夷更湏寬恕  
撫之則父子虐之則仇讐此不獨蠻夷則然但蠻  
夷則難於拘以文法常湏以恩存恤之遇事諭之  
以理便有拂逆雖笞罵亦未宜輕易克偉子瀘建

寧劉剛可為鑒戒

一奏啟本是進達朝廷湏字字點到一字差錯便是  
事君之心不至若行移諸司及所立案驗亦湏仔  
細檢點非但免罪此亦是學

一凡係官錢糧雖一分一合不可侵用收支際關防  
姦弊務要出入明白着實立案庶免後患

一若一時公務急迫小民倉猝措辦不得湏借衆力  
協助者協助既畢或有餘賸便湏對衆給散不可

一毫入己便是贓罪目前紛紛可鑒

一官府一切事務皆憑文案稽考近年姦詐小人往往設計毀滅連累不細大凡收貯文案之處常須親自照管關防不可怠忽

一雖微細皆須明白立案免後患

一吏卒之弊古今一轍其欲解事及中傷人常用閑暇之際三言兩語全似冷淡不着意者官長信之不疑遂致臨事顛倒是非變亂曲直自己枉受貪

汙之名而實被罪責矣故凡事有疑難猝發落者當廣詢詳察切莫不可輕信吏卒之言而行一有不實為害非小大抵待吏卒湏闢防而亦不可治之過嚴過嚴生怨而能為己之害惟正己以馭之使不得有為足矣

一里老所言亦未可輒信皆須廣察

一公暇無事可取舊案閱之可長見識觀律可知法意觀諸司職掌可知政理不宜怠惰凡仕者謹慎

勤勵和緩關一不可

一敬事上官如嚴父當存親愛之心不可一毫悖慢  
積此誠意自然可以感動之彼雖不善亦未必肯  
加害處同僚當如親兄弟湏相敬相愛我有不是  
彼能為我言之便湏拜受改之彼有不是我當避  
之從容與之言彼若不從又一兩次避之從容與  
之言湏積誠意以動之吾常愛兵部尚書全忠每  
部中行一善政必曰此出吾同僚非忠所及或有

過舉必曰此忠之愚昧同僚不預知也吾常以自警汝勉之

一閑暇熟看律精究古人用心仁厚處一字不可輕易忽觀

一刑者古人不得已而用宜切戒用刑蒲鞭蒿杖或三五下六七下不過十下示辱可也戒之戒之

一子弟家人勿令擅出擅出必仔細關防自己公務在外隨從之人亦關防之不可放縱

贈言示姪之芳

吾楊氏世守禮義服詩書仕者有廉節處者有善行居西昌數百年皆無敢辱其先者吾去鄉四十年今春始遂一歸宗人老長物故且盡後輩晚出行有違於先者多矣為之短氣索然雖召而訓之飭之其習慣成性安能必其吾從也吾留家四旬即行至今抱愧恨未已族兄叔遼第四子之芳來北京將歸乞言故書吾之所耿耿者勉之使務學為善庶不辱其先汝勉之哉歸見同

宗子弟其悉以耄言勵之如能用吾言非獨老人有光  
吾宗有光苟不用吾言或忝先世非獨不可見先祠吾  
亦不願見之汝往勉哉

訓導子默識

到家當脩敬者

七事

祠堂祀禮次日三牲祭臨來時辭亦須祭每日早詣  
祠致揖帶小姪去使之諳習遠行亦謁歸亦謁  
展墓半月內隨東門諸兄去每一處看墳者與匹布

無布則與鈔

宗族親戚家皆須到父輩行皆拜稱尊長親長同輩者稱曰兄年長者讓其坐

朋友隣里相識家皆須到湏兄弟及諸姪帶引湏孰謙恭言語和緩論事湏從容勿急躁

縣官學官皆須往拜之湏諸兄引領湏謹子弟之禮欲見官長湏請夔兄帶引若平常出行與羅昇劉廣同畿翩可常同行更不可帶無狀童僕

鄉里親識相邀餽贈皆須錄記來看不可昧之

當力行者

八事

一首去清林寺之門改作一小門十日內與序兄率人為之勿緩

一作急整理田糧過戶槩要槩要切不可緩

一凡係投送田土魚塘皆還原主切不可留此不可

論在遠在近

一打點一應書板整齊安頓學背樓上來時各印三

五部帶來

一豎立御書閣碑來時打二三本帶來

一點過家中一應書籍一應文字法帖圖畫皆見數  
并寫在文籍志有壞者就請工匠粘綴湏預先用  
花椒作糊

一湏親造蕭克潤處拜姑婆蕭季廣拜其內闈皆汝  
幼時受保育乳哺之恩者皆湏四拜蓋有母道焉  
兩處皆湏要人事毛頭娘家有兒女亦湏少與人

事

一緣途舟中寫下書信但未要封忽遇便人即填日  
封寄仍要見在某處發

當謹戒者

十一事

一最不可飲酒若被人苦勸不得已二杯三杯即止  
世之好酒者壞性敗德妨事廢學致疾喪身皆由  
於此故最當戒

一晚間不可飽飯夜間須着綿布衣睡須要裹肚

一不可頻數赴招飲須和顏軟語辭不可有拂人辭色

一非其人不可頻過其家若遇之顏色須和

一對鄉人言大抵謙和不可暴厲傷人

一凡請人作事須與工錢不可招人怨穢以勢凌人致怨者為此切戒切戒

一緣途皆不可登岸望人到江西亦不可登岸但回來時請蕭仲敬家一人帶到胡祭酒先生處拜之

即過

一但途中有先生長者及官員聞汝經過來望汝者  
此是敬汝父須親去拜謝即出不宜擾人

一到家便用俸米十石與楊和之子如彼處附近穀  
有穀則支三十石穀與之勿悞

一穀至不仁致族人顯達父子狼狽失所殊甚可恨  
即便討屋與住如急促未得且令在城背舊屋住  
下却從容別討便支俸米三石與之勿悞

一楊玄若艱難亦支俸米三石與之

吩咐道子及昱嵩諸孫十二事

一但係稷與人接受不明田土池塘山園房屋等業  
盡數推割還其原主雖我家曾與些小價錢亦不問  
他取只要開除自己戶內稅糧各處皆然勿違勿違  
一東門諸姪俱要遵依老叔之言從臾了落此事不  
可依稀坐觀成敗賓畿老弟亦然今遣和姪回亦  
專為督併此事須要早了無後患若有後患必

累葉呈及諸弟姪

一造墳湏擇楮原龍州如二處皆不遂意則聽於清  
林寺前再看斟酌亦要今冬見明白

一稷與奴仔盤費皆盡作急前來接濟

一諸人皆與昱母子說凡事俱要依我發落不許故

違惹累子孫顯達湏與屋住

一諸事俱在和姪口傳我言語寫不能盡

一稟與和姪度歲後作急啟行前來勿遲

一昱甚輕薄妄誕湏與其母說嚴切戒約之勿致輕

妄惹禍

一攔街之門務要折毀如舊羅宅諸房田土房業南  
岡頭人家田土屋業盡還原主各處皆然陳與寬  
若果無理分外先訴於余侍講先生却赴府縣告  
之

一戒飭諸僕各守本分尤不可縱林仔出外生理及  
下鄉取索此僕有百五十兩本錢在外閑湏知

更不可令昱下鄉生事

一和姪再來時湏與二十石穀安家或與十石俸米  
一家中有馬盡發賣不留子與諸孫皆不許騎馬我  
在此亦不畜馬只一驢代步耳

示長新婦

九事

我今年七十有九只為稷不孝違背父訓專交小人作  
惡犯法今得死罪致我受氣成病漸至危殆亦不過年  
歲間必死理無疑也汝吾家長婦今家中之事一一付

爾掌管一家大小長幼皆付託汝汝須每事盡心今遣  
稟歸發落數事可皆遵依行之勿違切不可聽信小人  
之言有所改易切記切記

一田土多則稅糧科差繁重必至累子孫破家蕩產  
苦害難勝即盡棄遠鄉田土山塘皆不可要近鄉  
田土池塘利薄者亦不可要或還原主或賣與人  
皆湏作急發落不可聽小人邪言依阿不舍至囑

至囑

一吾儒者之家不可思量要富戶下田不許過百二三十石戶下糧不許過三四十石儘足歲用切不可過多過多則後來必累子孫為父母不可無遠慮切記切記只是許多田糧在戶後來科差子孫也自難當

一家中凡事只請賓畿叔公之貞之夔之序之所四位伯伯來從長計議而行行事之際務湏體我心行我心只要戶內田少糧少後來不累子孫更着

實要籍冊過割與人明白不可存虛糧在戶仍累  
我家

一家中所藏勅書誥命御筆畫及一應書籍文字  
法帖圖畫皆是我平生性命心力所得家中務要  
常常愛護須是汝親眼同孫子小心勤勤看過遇  
梅雨晴霽則湏晒廳曬廳後還親自整齊收拾親  
自鎖鑰封閉此是吾傳家之寶絕不可借與人看  
雖至親之人亦不許借之緊要緊要更不許信付

昱子須是新婦一一親自整理蓋昱子兩年來甚  
懶惰不學只因前年冬稷來此驕縱他壞了雖極  
力整救不起近年只與奴僕小人相親全無心向  
學與父性一般家中凡事不可信付之不可縱慣  
切湏關防點檢往年只為新婦不能諫夫致有今  
日之禍若今為母又不能戒子將來更有不好昱  
在此與他書讀他就偷書與人切湏防之

一我今病甚稷又犯罪繫獄可隨時與昱婚配只祭

告祠堂拜見家中尊長百事皆隨時切不可違禮  
作酒席

一家中子孫不可斷絕讀書種子須延好先生教誨  
須嚴且勤為母不可慈愛護短事師禮須厚學俸  
須要實效不可少欠是婚後令讀書寫字不可縱  
他懶一體還先生學俸

一吾老且病穢又重犯未有生意二小子諸孫其產  
業皆須及我存日早定免致後來爭競不明不相

親睦也凡嚴夫人存日所買屋業田園陸土池塘及我寄回銀子所買田業不論遠鄉近郭並請賓畿叔公之貞之夔之序之所公同分作三分一分與稷諸子二分與遺林務要均平各成片段取便利但係稷近年新置屋業田土山塘並屬昱晟畧畊晏管業學後舊居只與遺林居住城外舊居仍作三分

一和姪在此多効勤勞可於學中支俸米十擔與其

子如米去不便與其家相近處有穀送三十擔與  
其子勿違

一稷之不仁致顯達全家狼狽即整居與住仍支俸  
米四石與之

遺訓

正統二年病中寫八件

一用平日私居所服深衣欵棺中悉屏金銀等物用  
絞衾書銘旌遵吾所命作魂帛設靈座到家則靈

座前從俗設影像蓋小孫未識我也棺內外用漆  
須周密舟中須帶漆備用一切喪事依文公家禮  
斟酌而行啟行及入舟過南京入江西境到泰和  
河畔皆奠告須舉棺到家於正廳安置亦奠告奉  
魂帛入謁祠堂於祖考前稷用縗服代拜此待到  
家擇日行用酒果告祖宗每一堂行五拜三叩頭  
禮

一急作書報稷令在家設靈席變服治葬事不可來

遠接待船到吉安則來永和以上接待棺出舟新  
婦與孫子來接

一擇葬地但取平穩高燥不生水蟻無坳風後來不  
為人居宅不為窑塲不為道路之類

一作墓湏作兩穴相並我居左穴空右穴以待郭夫  
人不可違命

一作墳湏自家出費我有銀酒餅及盂約二十餘兩  
足備輶石等物之用不可以作墓累鄉里蓋吾素

無恵利及鄉里也不可違命

一欲為墳墓經久堅固之計則用王時彥學士葬母  
及太僕寺丞豐城丁維南葬妻之法皆好如資不  
敷則以吾平日所用銀酒盃大小六箇益之惟留  
小撒蓋十箇為郭夫人他日復土之用不可移動  
丁法見吾所作其妻墓文時彥之法有親筆書

一墳前不作享堂勿築牆垣亦勿如鄉里用甃石作  
盤合樣以貽後患只是以土崇厚築之但遇雨水

傾塌隨即加築築湏十分堅實墳前勿建神道碑  
勿立石人石獸只立一望石遵遺命所題近墳置  
少田土以備祭掃此皆不可違命

一吾去世之後始終不許從世俗延僧道作善事追  
薦蓋吾平生所存惟尊君愛民之心所行無傷人  
害物之事但不免嫉惡亦當正理故雖未能為善  
未嘗為惡果有地獄吾必不入子孫切不許聽俗  
人之言為此事以污辱我如違我命即是不孝我

死有靈必不祐汝

正統九年三月治命七件

吾在世已久踰越分願無所遺憾但官品崇重國恩未報此雖死不能瞑目耳身後數事預示子孫此吾之治命其遵行之不可違也

一只用幅巾深衣斂須用絞衾庶幾柩歸經過肺填可得穩當

一吾生平不曾用僧道死後亦勿用只依家禮祭祀

祭物隨時所有不必豐但設我平日所用冠帶袍服於中行禮祭告之文亦用家禮不必新作

一凡今喪家遇親朋來弔者皆散孝此是北方風俗南方素無此禮古禮亦無蓋弔是常禮孝是凶物豈可自進凶物請他人為已持孝大非禮非禮吾死後切不可行或有搢紳大夫來弔待賓者明謝以非禮不敢褻瀆實非慢也

一吾久病數累公卿大人垂問感愧甚矣今不能

報煩院中一僚友干浼少保先生宗伯先生冢宰  
先生三大人遍叩列位公卿大人一切遣祭遣賻  
並止不行至叩至叩同院僚友鄉里親交及歸途  
有相知者欲行祭賻皆謝卻之此吾之中懇非矯  
情也力辭力辭

一作急寫書托徐尚書大人倘有馳驛上廣東者寄  
去報道令急急作墳楮原龍州隨擇一處乾燥平  
穩無凶禍者便選日興工切不可求子孫利達如

此然後易成蓋要利達湏力學脩德不在風水也磚  
石石灰務要堅固於外只作一大土饅頭必湏自  
費不可吝慳庶得釜完若延緩稍遲必累煩鄉里  
重吾過矣

一柩到家可且安止於學後正廳却擇日葬亦不可  
久停蓋死者覆土則安矣

一啟行回去凡書籍文字湏逐一收拾包裹愛護舟  
中尤湏謹備雨水漏濕片楮隻字不可損壞遺落

法帖圖畫皆然

東里續集卷五十三

欽定四庫全書

東里續集卷五十四

明 楊士奇 撰

詩 四言

駒虞詩并序

永樂二年八月駒虞見鈞州鈞州周王封內之地  
王往觀焉載以歸乃九月丁未躬詣闕下上表進  
獻羣臣聚觀懼懌舞蹈以為從古罕見夫嘉祥之  
出必有至德在於尊位若馬呈於河龜見于洛皆

有所由考之傳記騶虞仁瑞之獸今茲之見豈偶然哉洪惟皇帝陛下臨御以來脩舊章明教化覃布德澤除弊建利爰自親親以至仁民愛物天覆而春育四海之內翕然咸和殊邦遠國數萬里之外不待告詔莫不稱臣效貢稽首來庭此皆陛下至仁之德旁孚遠被之所致也嘉祥之出厥有由哉臣士竒竊見自去歲以來四方上奏祥瑞不可勝數陛下聖心惟民為重皆以謂非切實用抑而

不貴然今騶虞之見實上天所降至仁之應非如  
其他草木之珍鳥獸之異豈可隱而弗宣哉輒效  
詩人歌詠之意謹拜手稽首而獻詩曰

維天至仁涵育萬類維我皇明一德作配穆穆太祖奄  
有八埏仁覆其人大哉如天皇帝仁聖同符太祖天命  
人歸緝熙九五皇帝曰祗予臨兆民上天皇考予承維  
仁乃詔多方乃循舊章乃求遺逸乃登俊良德教宣明  
需澤覃敷靡彊不馴靡弱不扶濡槁滌汚起廢疏埋天

叙秩秩人文彬彬

闕

小大熙熙夏葛冬裘不知

渴饑聲教漸被孰有內外邇悅遠來極地所載雕題漆

齒椎結辯髮梯航重譯俯伏北闕至和孚洽協于天人

無遠弗庭百祥萃臻嘉禾瑞麥甘露芝草白雉黃犀皇

不為寶維鈞有山在彼周疆乃產異獸皓質緇章首耳

脩尾身虎而馴食不生物性麟之仁維周親王往鈞于

田迫之弗驚擾之以還曰斯騶虞皇仁之符不遠千里

獻于皇都王拜稽首皇帝仁聖維仁動天靈祥協應帝

曰匪予子弟仁孝發祥周邦維王之召王曰匪臣萬邦  
帝治帝德致祥臣敢冒之羣臣百工觀視嗟嘆自昔有  
聞於今實見懼欣拜舞帝仁所來帝曰予仁曾曷不施  
予懷忠賢為國之禎菽粟布帛民資以生時無不獲予  
治斯德嘉祥異物豈予攸亟羣臣拜手皇帝聖德大禹  
不伐商宗恭默皇心一揆皇壽萬歲維天降祥如川方  
至臣職載記獲睹休異敬陳歌詩永告來世

聖孝瑞應詩有序

洪惟皇帝陛下以孝治天下所以教化紀綱之道  
一遵太祖聖神文武欽明啟運俊德成功統天大  
孝高皇帝成憲天下萬國之人承風鄉化熙熙然  
入於泰和之域矣陛下聖心重惟皇考皇妣陟降  
在天瞻侍無所乃於永樂四年十一月庚申徵天  
下道士咸至京師即朝天宮神樂觀洞神宮脩舉  
金錄齋法表孝思也車駕幸齋壇聖神虔至對越  
在上肅然有臨辛酉有青鸞白鶴翔舞於神樂觀

壬戌車駕復幸朝天宮有寶蓋五色光輝奕煜自  
正陽門冉冉入于皇城癸亥有神人見神樂觀甲  
子卿雲見朝天宮乙丑甘露降於宮樹丙寅車駕  
復幸朝天宮卿雲覆映壇上鸞鶴數百翔舞旋繞  
既訖事二日醴泉出神樂觀甘露復降孝陵臣切  
惟禎祥之出皆不徒然謹按鶴冠子曰聖人之德  
上及太清下及太寧中及萬靈則甘露降醴泉出  
孝經援神契曰天子孝則慶雲見若鸞鶴之應道

家為重惟神人嘗一見於漢武登封之際而畢見  
於今日既當聖誠感孚之時又皆出於神明戾止  
之地實由陛下大孝深仁至誠之應辛未羣臣上  
表賀以為陛下聖德純至用克膺茲嘉祥陛下謙  
抑弗居一歸本於皇考妣聖靈以下及羣臣協贊  
之力又申飭羣臣古先哲王皆因祥思懼今不宜  
有所怠忽此益以見陛下與二帝三王同一盛心  
臣叩塵侍從躬覩盛事不可無歌詠以鋪張鴻休

謹拜手稽首而獻詩曰

惟皇御極八紘率俾曰孝曰仁爰教爰理惟皇考妣著  
存無間豈曰羹牆斯須有見洋洋聖靈陟降在天遑遑  
孝思皇心有虔乃循玄範乃脩金錄爰伸終慕暨惠普  
率惟皇淵衷齋莊純一對越有嚴有恪有翼上帝有言  
忱孝子子百神有言篤恭于主至誠感孚禎應駢臻縞  
鶴僂僂青鸞翩翩下上壇墳周旋廡序徘徊翶翔如披  
神馭煜煜寶蓋絳節黃麾流越端門如神往來復有神

人有言有告出入倏忽邈不可究復有御雲五章爛垂  
輪囷歲蕤琪葉金支粲粲天乳滑滑甘露既零道苑亦  
降陵樹厭浥瓊脂淋漓玉津以薦以飧統和天人訖事  
秉虔如盥未薦繩繩休徵疊出層見有深規甃有泉漿  
漿苾芬充達沾者酡頰穹祇發祥式昭孝誠羣臣拜手  
皇德之徽皇曰匪予天地考妣降鑒畀祐錫時蕃祉自  
昔明聖膺祥務敬汝予協恭庶臻永慶羣臣拜手惟皇  
聖明皇不自聖臣敢怠寧有臣士竒紀載是職敬陳歌

詩永播無極

瑞星詩有序

臣聞之書曰惟德動天又聞之先儒曰天心仁愛人君有以灼見天與人君之相與也夫天不言而恒示人君以象有動乎此必應於彼或昭德或示儆莫非所以仁愛之也往古可徵矣恭惟皇上以仁聖之德奉天命嗣大統臨御以來孜孜夙夜體天地之心以愛人守祖宗之法以為治敷布德澤

脩明政化四海萬邦咸樂太平祥瑞之臻史不勝  
書迺宣德五年冬十二月二十有一日夜含譽星  
見于九旂大如彈丸色黃白光耀有彗欽天監言  
占法含譽瑞星為君上施孝德興禮樂人民和悅  
夷狄奉化來朝之應於是羣臣忻悅抃舞皆以為  
皇上聖德所感國家隆盛永遠之慶奉表上賀聖  
心謙抑推而弗居且賜璽書戒勵彌至蓋與夏禹  
之不矜不伐商宗之嚴恭寅畏同一大德也臣忝

執筆預侍從敬賦四言詩一篇紀述盛美謹錄上  
進伏惟電覽焉詩曰

惟天之高蕩蕩難名仁覆萬類大德曰生惟君憲天行  
天之道仁育羣生下民是保天監君德有允肖之來享  
來歆為祥為祺皇欽天命嗣臨大寶嚴孝宗廟祇奉聖  
母夙夜恭勤惟德之濡始于家邦弘及四海飢者食之  
寒者衣之槁者濡之仆者植之如藝黍稷薅莠與稂驅  
去螟螣罔俾害傷矜惻鰥孤撫字無告有昧弗率勉勉

教詔除其凜冽敷之融和化威以愉易嘯以歌立綱布  
紀惟賢之庸推亡固存履道大公乃脩德化制禮作樂  
天叙有常人文煥若芒芒四裔雨露所墜慕義歸誠靡  
或弗至上帝曰俞允光予命何以報錫式鴻厥慶嘉禾  
異麥駢出于下駢出于上慶雲膏露宣德庚戌月維己  
丑其日丁亥文瑞在酉大星如丸九旂之傍有彗若射  
金玉其煌素蟾東生皎乎相輝河漢為蒙參井為微厥  
名含譽太史敷奏百辟嵩呼賀祥獻壽皇德仁聖謙讓

是崇歸功穹祇歸功祖宗歸功聖母亦及臣子申命飭  
勵敬哉無怠稽古大聖軒轅唐虞咸有瑞星昭德之符  
皇德格天前聖一致肆用作詩永告來世

仁安堂詩為任敬立賦八章

奕奕高堂麗于城隅有植其藪有列其書 高堂奕奕  
既闊且殖展矣君子秉心之德 其心伊何相人予均  
其德伊何侯利安于民 民之顛沛維予之殆民之憐  
憐維予之瘁 民之瘁矣予胡寧居言遄赴之弗步而

趨民乃定矣予心則夷維予心之夷曷報曷施帝懷康靖弗懈夙夜孰遏其升不顯在下南有松栢以柱以楹聿觀爾升誕惠厥寧

蔣氏三逕詩有序九章

鄂城蔣立恭慕其先世諱作三逕粵人吳德英圖之楚府吳勤教授前進士廬陵蕭尚記之序之其友楊士奇為詠歌之其辭曰

瞻彼三逕于湖之側鶴嶺在南鳳岡在北瞻彼三逕

于湖之干有植桓桓有蔽欒欒 維此幽人辟之治之  
維此幽人宅之宜之 不亢而连不僵而嫋中心億億  
爰來爰處爰率我先祖 維我先祖予恒游息既寬既  
碩予是儀是式 廢有旨酒亦有肥牲時洽我隣及我  
良朋 式優以游式燕以休曷競曷柔曷畀曷求 相  
此幽人胡樂陶陶相彼貪人亦孔之勞 有圖有文既  
昭且宣暨予作詩申告弗謾

東川迎養圖詩 有序十章

東川遂養也君子仕為東川守有祿迎養其父母而樂因以示化其民也

東川之潛樂樂栢松君子于行其樂融融  
東川之潛君子于行其從彬彬 首之皤皤儀之襜襜  
君子有父聿來自南 義義翟冠蘭充其禕君子有母  
自南偕來 君子拜稽言笑嘻嘻父母聖仁不我遐遺  
維父與母眉壽而康維兄與弟左右扶將 行其野  
矣有桑有麻入其邑矣有絃有歌 奕奕高堂式燕以

嬉匪直孝恭其施孔宜 凡厥庶民各有所生孰時觀  
之弗感而興 懿是孝德有肇有循肆庸作歌以告厥  
民

聽烏軒詩為劉宗韶作

民物之生厥賦惟均氣稟既殊靈秀維人其生之初父  
子之慈民物斯同靡或有虧林棲者鳥性純且仁反哺  
維勤其參其騫維父維母生我鞠我父母孔勞我心曷  
舍雨露既濡履之則悲哀我父母我寧以時烏鳴且和

養適其私靜言聽之我心何如天之高矣日之遠矣哀  
哀父母我心曷已立身揚名維孝之大勗爾君子敬勵  
于志

後山詩為江西林憲副作八章

崔崔後山清漳之潛下蟠厚坤上摩穹旻山有嘉植  
維松維柏亦有令人維英維特維子潤甫愷悌君子  
奕奕高堂在山之趾道積于躬靜與山處及時奮庸  
懷山曷已山則升雲興雨祁祁有道于施君子之宜

大江之西維國南服政紀之明不嚴以肅 肅如秋  
霜示民之威熙如春陽維民之懷 維山之崇不遷厥  
常維君子譽式永其彰

題輝姪蘭

幽澹其芳介于貞石何彼鸞鳳而棲枳棘言念君子可  
以觀德

題升龍

陽德中正與時偕行乾元九五天下文明

題降龍

雲行雨施萬物咸春收斂神用淵潛自珍

承訓堂詩有序

姑蘇顧仲華甫一子暘朝夕訓之暘敬承唯謹遂  
請於父名其侍養之堂曰承訓間求余詩余嘗過  
顧氏愛仲華甫瀟灑散逸尤愛暘篤實溫靖善事  
其父與其繼母蓋內外無間言暘字東啟深於醫  
製藥尤精余老疾資之多矣故賦古詩一篇用致

嘉勉之意云

奕奕高堂有父有母父母孔慈錫我教誘其教伊何曰  
義與仁于愛之真于言之諄敬恭聽之允率履之父母  
孔仁而敢怠違父母猶天敬事朝夕我行或怠貽我父  
戚孝哉賜也永欽爾終爾德式嗣福祿來崇

具慶堂詩有序八章

駙馬都尉邢臺井公永清作堂以奉其父母名曰  
具慶求余作詩其父九疇甫初擢給事中在南京

與余居同閭巷朝接班行時相往還九疇甫惇實  
和厚慎靜不譁其友張子玉又為余道其家居之  
行及世德之厚余固意井氏之榮非止近侍也居  
南京時都尉公雖志學之年已翹然楚楚之異衆  
炯然白璧之映人蓋知井氏慶澤所鍾其在茲也  
公今躬膺榮命貴聯戚畹得厚祿以奉二親於康  
寧和豫之時固仰荷國家之大恩亦必本其祖若  
父積善累德有以迓承之也斯堂之作其知尊本

矣故為之詩曰

鬱鬱喬林發厚于本源厚且深其流斯遠 維邢井宗  
世服善仁迨大父父厥脩益勤 父也在廷祇帝任使  
帝錫寵加簡升其子 子尚貴主聯嫋天潢玉輦麟衣  
貂蟬煌煌 遷作高堂奉父與母致隆愛敬日獻春酒  
春酒在尊鼎薦芬芳父母眉壽允樂且康 允樂且  
康孝心孔寧立身事君維孝之經 士奇作詩用諗都  
尉具慶百齡令聞長世

永思堂詩有序十章

吉安府推永春顏君文盛端靜廉厚君子也在吉  
三歲每江右藩憲二司及過使之良至京師道官  
於吉者之賢必舉太守四明陳君與顏君為首稱  
僕前歲奉命歸展桑梓聆九邑士民道二君之賢  
而戴其德如出一口蓋二君皆仁其民如父之於  
子明於獄如鑑之照物無淹繫無滯牘此吉之人  
所賴以安者也顏君痛二親之不逮祿養也名其

退食之堂曰永思間求為詩余素重顏君故探其  
情而為之賦亦願有告焉郡之細民寧忍困苦而  
不敢言者胥吏為欺之蠹也亦九邑之人如出一  
口者君白於陳君相與致明決以蘇被困之民則  
亦永思之推也

南山之木厥有本根浩浩川流則亦有原 凡世之氓  
孰無父母生我育我憂勤是保 我疾在躬父母怦怦  
我躬既平父母載寧 我事父母千載未足云胡一朝

去我不復 林棲者烏則有反哺哀哉小子欲養無所  
豈無厚祿豈無華纓我無父母于誰為榮 麋旦靡  
夕孔懷弗忘父兮母兮如睹羹牆 居則以思行則以  
思音容慌焉夢寐對之 父天母地覆載同德哀哀我  
心何窮何極 先哲有訓立身忠君我惇用之敢怠于  
勤 無敢怠勤恒恭敬止終焉永懷悠悠曷已

題張子俊山水

高山崔崔青川瀾瀾息有幽居濟有輕舟已遠人境同

志來求優哉游哉足以忘憂

題陳憲虎

肅肅其文眺眺其眎豈不虓怒父子仁在

題陳憲龍

雲行雨施陽德之亨豐穰以成天下以平

榮壽堂詩有序

江西左布政使毗陵吳公潤二親在堂春秋皆將八十而康健和豫嘗蒙恩賜誥封父用深為中憲

大夫廣信知府母金氏為太恭人邦人士慶公之親之高年而承天寵也名其奉養之堂曰榮壽太子賓客胡先生為之記又求余詩公起家秋官屬歷守數郡陞雲南憲使又簡陞今官閩敏廉惠所至有善政為之詩曰

奕奕高堂奉父與母父母善仁天錫多祜厥祜伊何耆耄皆臻和樂且康皓首顏頰雲章自天式顯賁之命服煌煌封秩馳之孰無父母偕老幾何云誰之居被時寵

嘉福祿鼎來其奚自致嗣有君子熙帝之載桓桓君子  
奠此南服民恃方伯朝倚岳牧維敬維仁以共帝命維  
孝維忠以樂具慶

題白雲山房圖 四章

高山在上清流在下懿彼幽人託此適處 英英者雲  
蕪蕪者林懿彼幽人其潛之深 有舟有梁莫或以之  
嗟此幽人優哉游哉 翩翩飛翼夕倦斯還逝予從之  
以終歲年

題泉坡學士龍

時而淵潛時而雲升乾元九五天下文明

題水仙

漢廣之濱清洛之汭留此娟好邂逅誰遺

題菊

秋霜既肅黃花始妍爰掇爰飧聊可永年

題護草

對此護草粲乎有章我自陶陶何憂何忘

題玉簪

姑射之姝翠衿如幃惟顯簪玉不覩容輝

題蘭

懿此芳蘭在彼巖阿為佩為帶懷哉九歌

題鵲鴒圖

有序

姪子和重兄弟急難之義遠來其歸也賦詩送之  
人之親愛至性所有維兄與弟如足如手兄弟急難我  
心則疚興言赴之匍匐敢後沿江歷湖自南而北遙遙

萬里敢遑暇息亦既晤覩季也其羸淪墜泥塗伯也傷悲矢辭顧天天聽高高伯也怦怦中心孔勞昔我始來青陽肇序日月云邁歲聿斯暮念桑與梓我行將歸顧視予季予寧不懷顧謂予季予豈汝違予行復來春以為期鵠鵠之詩在昔有作兄弟急難視古何怍

辭

蔣隱溪輓辭三首

顧瞻兮堂前卷帷幕兮藉蘭荃陳清醑兮載肥鮮韻悲

管兮切哀絃淒風激兮櫓軒雲黯黯兮靈來旋恍如睹  
於形色兮儼若聆夫笑與言言可聆兮意不傳悵思公

兮臨几筵

北風凜凜兮天雨霜木葉脫落兮百草黃翩銘旌兮辭  
高堂豈靈車兮秀冲岡萬里歌兮哀以傷玄室一闕兮  
夜甚長魂渺渺兮何方螺山崔崔兮螺川湯湯青原與  
白鷺兮鬱相望悵思公兮遊故鄉

玉珮兮瓊琚霓衣兮霞裾秉元化兮握靈樞列缺從兮

豐隆趨倏陰而陽兮忽卷而舒晚視濁世兮如汙渠飄  
然乘風兮凌太虛參王喬與韓終兮列仙為徒遊紫微  
兮帝之都悵思公兮邈天衢

題歲寒三友圖

松蒼蒼兮虬枝竹脩脩兮鳳羽梅皎皎兮瓊芳凜寒節  
兮偕處芬芳菲兮春暉倏零落兮秋露惟所稟之貞潔  
閱歲年於遲暮含匏笙兮雲中和清角兮月下諒同志  
兮金石渺予懷兮延佇

盤谷草堂有序三章

盤谷在西昌邑東北十里許楊氏先世墳墓在焉  
比年子姪多就墓傍作別業為耕讀之所之序之  
居題曰盤谷草堂善繪者圖之余為作盤谷辭三  
章書之辭曰

盤之中兮崇丘交青蒼兮松栢懷先祖兮永逝託吉壤  
兮玄宅跔酌兮寒泉薦蘭秀兮芳菊春雨零兮秋露耿  
孝思兮無斁

盤之中兮幽居聊逍遙兮棲遲朝采兮林芳夕攬兮巖  
芝仁與義兮是明懷孔顏兮吾師安吾分兮塞劣何富  
貴兮可期

盤之中兮良疇下宜稻禾兮高宜來牟春出耕兮夏耨  
旦勤斯兮夕休或雨暘兮匪時何倉庾兮有秋懷古人  
兮食力吾弗力兮誰尤

送別辭

留石瑱兮洞庭遺蘭佩兮澧浦羌不懷兮別離獨徘徊

兮延佇

詩五言古

題林靜小景

幽居無俗韻山人有餘清鳴湍瀉晴壑高秋轉早鶯相  
攜一散躅亦得暢其情

題朱四智夢草軒

骨肉皆鍾愛兄弟重連枝生為同一氣歿為永別離誰  
言永別離夜夜夢見之夢見何所為和樂如故時忽覺

各分散泣下橫交頤中堂理單簾聲悲不能諧絲絲而  
弗忘中自長相思謝子篤天倫夢感著聲詩因之名我  
軒恒用著所懷

聽艾仲宣彈琴

公子散煩襟留客撫清琴一彈黃鸝操再鼓陽春吟洋洋發冲響泠泠諧素心非今同勝會誰聞奏雅音

贈沈教諭奔喪歸閩

祿養欣有遂何言奄棄茲哀哉風樹懷百折不自持列

惟輶絃誦豈但蓼莪詩晨起餞旋歸烟波滿川汎徘徊  
一顧望憂人益增悲涼感天地恩寧為悲別離須臾為  
千里緬焉安可期唯應問業者惻惻此江渭

題鄧秀才寒翠軒

清軒大江畔前有竹松林蕭條霜雪時愛此碧森森窓  
中看掩映席上對陰沉非將玩適重歲暮可論心

題太乙真人蓮葉舟圖

至人棄汗漫遺世若虛遊不假桂為楫飄颻一葉浮仰

觀天宇澄俯眎洪波流茫茫蕩無垠泛泛任去留富貴  
多憂虞仙道我所求弱流倘共濟從之覽十洲

壽吳孟勤先生 二首

大明有碩士乃在國南鄉被服夫容衣皋蘭襲芬芳雄  
辭由令德繁繁發奎章名聲布遠邇延頸誰不望昔者  
螺水湄今來鵠山陽高筵酌甘醴懽樂誠未央

峩峩黃鵠山直上凌五城仙人駕彩虹飄颻臨我庭借  
問此誰歟陵陽與客成玉杯注丹焰磬折奉長生達人

舍至道自與元化并遨遊紫庭中逍遙龜鶴齡

繆都指揮輓詩

龍飛肇淮土維公奮雲從揮戈逐代北躍馬趨山東  
崢嶸推勁敵意氣當前鋒百戰有爵位屢遷乃益崇洞庭  
與彭蠡先後填巨邦百歲焉足多一朝上埃風靈車發  
華屋祖送出崇墉蕭蕭衆馬悲淒風激大江去去雖已  
矣垂譽恒無窮

送貝惟學還會稽得此字

時省母兄來鄂

高堂雙舞衣日奉慈顏喜先壘別經時何堪戀桑梓杳  
杳浙江瀆依依漢川渙懷徃忻已遂傷離方未弭即路  
有憂懼去年俱若此

奉寄李丈人

晨登黃鵠嶺引望陵陽岑陵陽渺天末何由見所欽自  
昔攜手時蕭散大江潯出言諧鼓瑟中孚利斷金一朝  
分袂來寒暑三四侵翰飛薄遠霄鱗泳循清潭高深曠  
不接隔我浮與沉堂中侍愉色膝下儼纓簪祿養崇甘

肥懽樂日駿駿久要焉獨忘一往無遺音尚希保眉壽  
以慰飢渴心

題三泖歸耕卷贈管時勉歸吳松

客從雲間來自言家遠村用世闢材具委身服田園開  
春起東作良苗日愈蕃下無螟螣苦上有霖雨恩年和  
易堅好為力誠不煩當秋負穫歸如坻積我門公家且  
輕稅豈復憂飽溫賢婦持機杼稚子牧雞豚傍舍數老  
翁懽會無晨昏其人雖朴野皆有忠厚言相與墟曲間

焉知市朝喧違此未幾時九扈鳴已繁去去情益敦浮  
榮終不論

題艾仲宣蘭

昔年春月夜弭棹湘川湄邂逅鼓瑟人佩纕紛陸離寧  
知忽不見芳馨貽在斯

題艾仲宣菊

高堂二月中粲粲羅芳樹日夕涼飈來紛然已如雨君  
看籬下姿可用怡遲暮

題伯牙鼓琴圖

平生山水意託此孤桐絲之子無旋期茫茫誰復知閒來幽樹下欲奏已遲遲

題彭憲僉白海青圖

由來搏擊威雲鴻不敢即佇睇極青冥羣飛皆戢翼柘府坐着時重有秋霜色

贈陸伯陽

三首

粲粲白玉琚本生崑山陽一朝蒙采擇高列珩與璜佩

服合其儀和鳴日鏘鏘礮硃昔同櫝頰仰方自量  
妖媚園中花豈不當春榮孤高陵上栢嚴霜厲堅貞匠  
氏來相求藻繪升棟楹固知君子人特立以成名

南岳有威鳳竹梧得其依五章備文采鳴聲合金徽聖  
皇蒞九五四海揚德輝翩翩初來儀雍雍復旋歸

題蕭德通所藏崔白鵝

衆鴻厲高騫逍遙薄天漢詎無肅肅羽而獨懷波瀾特  
立諒不羣振鳴終伴與名書亦奚為懿此焉足換

賦丘原芳林隱

達士布高位幽人在中林貴賤有定命聊用得吾心方  
宅五畝餘灌木鬱蕭森浮陽映密葉清雲散庭陰回風  
激蘭薄餘芳襲我襟雖無絲竹清嚶鳴懷好音殘帙不  
停披肯酒恒獨斟獨斟忽復醉時時吐高吟幸無異患  
侵自適非陸沉知分理攸宜誰謂倦華簪

蕭安正贈白紵賦詩為報

時余初免喪

朱明變寒節曜靈赫南馳端居念初服感激悲憇悼春

暉奮道盡誰為遊子衣豈不荷重纊後時非所宜君子見存恤縞紵貽贈之素質颺白雪纖理瑩文漪裁縫被弱體濟濟生光儀逝將表明惠永歌無斁詩

解筠澗先生輓詩

東山千餘仞其下水馳馳水去不還高山黯無輝夫子在世時芳名揚四陲夙志驚姬孔肆力究皇羲宵萬化原玄悟探其微秋荷襲裳衣春蘭充佩樟發軻蹈佳軌周旋豈踰規道存希有濟才高未見施曠視六合

中時時寫雄詞奮如蛟龍躍燁然雲章垂濟南講遺經  
河汾論匡時翹翹問業者詵詵日來歸居常以樂天逍  
遙介期願一朝隨埃風飄然遠去茲庵忽歷星霜今來  
四五期嗟余忝鄉郡夙昔仰蓍龜引睇鑑湖阡徒懷後  
時思頫仰杳茫茫中傷公詎知

送黎信歸故鄉

商飈起西陸倏忽為素秋客行惜遲暮懷歸逝不留舟  
楫晨已具送子河之洲千里遠結交三載篤綢繆歡洽

諧琴瑟夙昔同衾裯云何當乖分私情悵悠悠山川繞  
歸路豈不思同遊俯觀江漢水滔滔俱東流惜哉南飛  
鴻孤鳴違匹儔別離誠難任斯須亦何憂終當返舊林  
歲暮共優游

夜宿山家待宋惟憲不至

主人罷尊酌稚子具衾裯稍稍松火息寥寥獨未眠林  
高風響迅窓虛月色懸行侶時相失懷抱自悽然

寄題王氏槐陰軒

結宇臨長衢開軒面嘉樹靈根沃鮮澤由來深且固柯  
葉浮青冥垂雲幕囱戶紛華避春節孤芳弄秋素王生  
屏世營端居多暇豫潛玩聖賢言常懷往古務蔭止諧  
夙心還因動遐慕仰惟先人德封培昔已屢敬承乃汲  
汲時存荒逸懼窮達知有命非緣高爵故因歌寄幽軒  
為子寫中懷

送王經歷奔喪還偃師

清代服朝命懷此好爵靡安知失所怙抱慟俄在茲轂

理遵反路歲暮風淒淒行行泣且悲血淚不可揮歸當  
趨故庭益復哀以思竭力諒弗逮致身猶可希庶幾強  
節慟顯揚以為期

黃侍讀家賞瑞菊

霜降豐鐘鳴虎嘯谷風生氣類各有召何況善所徵君  
子際昌期冠綏趨明庭致勤靡夙夜惟恭秉忠貞至誠  
會感孚嘉祥聿來應衆卉悴寒節貞菊粲前楹同帶迸  
頽蕤駢芳出紫莖動如比翼翔靜若連理榮夕下玉堂

中高賢集良朋玩賞驗至理謳吟播芬馨孰云微植茲  
從知兆方興謹始永弗渝奕世垂休聲

送楊參政景衡考績還福建

恭命佐南服緬臨山海區旬宣盡臣職夙夜忘其劬惻  
惻軫民隱究究運良謨明如孤月懸溫如春陽舒八州  
諒闊遠惠化固不敷行身著表率下者無侵漁千里亘  
絃歌遐邇皆晏如考績屬茲歲整駕趨皇都峩峩雙龍  
闕彤闈煥金鋪劒佩森九陛朱衣肅來趨拜辭遽徂征

言歸即脩途相送國南門何以贈離居宦成古所戒善始貴無渝期君永終譽庶貽青簡書

賦得快閣送曾日章使安南

時以鴻臚卿行

朝日麗金闕  
赩霞煥彤庭  
拜辭出君門  
歲暮萬里行  
行指古交州  
南雲杳冥冥  
駿馬向風嘶  
翩翩逐行旌  
遙經彭蠡澤  
還過西昌城  
傑閣何巍巍  
弭節一來登  
章水朝宗去  
三山如抹陵  
思憶雙龍闕  
北望心怦怦  
懷遠由聖君  
宣德命九卿  
載馳實臣職  
豈敢稽王程  
伊昔黃太史

遺祠並南楹且復禮前脩感激慕忠貞逝矣慎樹立于

春齊鴻名

送吳寺丞歸滁州

白露下梧桐秋風激砧杵策馬出都城揚舲越江浦朋  
遊皆佇立望望滁陽路昨晤恨已遲晨別嗟何遽念君  
將門子恬澹如韋布文藻發篇章游情在毫素前者撫  
媯嫠攀轍惜其去歸來官太僕優游九卿副三載畜蕃  
息考績騰令譽瑯琊山水清周游昔已屢歸心復遄飛

斯須不相顧安得徃從之一寫予所慕

送鄒尚友赴澧川

新春散寒沴旭日明江浦浦樹淨亭亭猶含夜來雨遠  
客促行邁故人皆出祖初來自西川遄征泝南楚離別  
即須臾晤言方幾許聖朝憫惲嫠簡賢需召杜愷悌終  
薦達承流寄綏撫澧水出涔陽東連洞庭渚其俗本惇  
朴其民素貧窶竭力供縣官何嘗厭勤苦茲晨望賢牧  
蚤暮急延佇行矣敷仁恩殫心副當寧

贈王行敏

芙蓉麗晨旭粲爛雲錦垂采折欲有贈徘徊增離思嘉  
晤詎幾日星言復南馳滔滔逝長駛流光奄如之念子  
崑山秀皎皎瑚璉姿終當膺薦達磨琢貴及時高齋面  
山水卉木含華滋棲遲固適意靜脩諒所宜勉哉慎樹  
立以副平生懷

蔣用文院判靜學齋詩

齋居臨廣衢靚深絕塵氛嘉卉粲前列芳帙左右陳君

子抱異尚稽古夙所敦雞鳴整冠佩肅肅趨楓宸既退  
此閒逸曠然謝紛紜農軒回夭折周孔明義仁徃軌懸  
日星力探冀身臻志寧啟妙悟黽勉忘宵昏靜慮而有  
得嘗聞先哲云看君振高策奕世揚清芬

題王孟瑞寫竹寄本之

北風起郊甸寒聲驟長林引領睇溧陽懷賢思彌深耿  
介直士節幽貞君子心平生惇契好如彼雙南金昔別  
夏未届今來春載臨吳絲將蜀桐和諧會相尋豈乏桃

李花秋霜易見侵  
懿此歲寒操持貺心所欽

胡學士山居八景之二首

竹塢雲林

衡門對芳塢上有脩竹林旦暮碧雲合掩靄成幽森雲  
起欹乘運從龍沛甘霖終焉君子節永矢歲寒心

夫容寒雪

結廬在滄洲前對夫容好寒冬飛雪凝開門翫瓊島皎  
潔如我心攬之以為寶出處自不渝可與知者道

題三顧山劉氏文會堂卷

岩堯三顧山飛流下澄澈靈秀之所萃爰昔鍾賢哲正學明綱常直氣遏邪孽至今鄉間士堂堂仰清節書臺鬱鬱峯遺風耿未減比屋儼縫掖羣居蹈高潔之子抱貞素曾何汙緇涅奕奕峙堂構翛翛蔭林樾豈乏穀粟儲羣書富羅列同志五六輩時來共怡悅研覃沂周孔辨析窮毫髮至道日有得中懷炳昭曠明善固所資誠身理逾切願惇輔仁訓庶不忝先烈

題商顏東山二圖 二首

迢遙商顏下優游晏歲時玉泉流石乳青松蔭紫芝非  
為文成君姓名誰見知

夙尚在高潔雅懷非陸沉東山詎云遠蒼生望亦深孰  
謂高臥者而無匡濟心

盤龍曉翠詩

英年擅文翰雅韻超凡庸家臨文水渭門瞰盤龍峰蜿  
蜒帶城闈峩律凌高穹詰朝敞東軒初旭明瞳曨宿靄

靜陰翳秀色開青葱凝輝射虛牖含潤清簾櫳正襟此  
晤對澹然浮慮空趣與妙景會心將玄理融稽古率攸  
行進退其有窮恒惇旦氣養庶期日新功

西疇耕讀

幽棲寡世營結廬在西墅充室惟詩書開門繞田圃方  
春九扈鳴倣載向南畝高原燥宜黍下隰濕宜稌種植  
既得時耘耔亦無苦況當長養節霖霖承膏雨朝耕暮  
還息潛心以稽古上窺姚姒餘下掇姬孔緒黽勉究微

言優游啟玄悟所得欣日新逍遙自容與年登秋穫竟  
穰穰溢我庾擊鼓薦犧牛懽娛報田祖傍舍數老人言  
行皆鄒魯相與知帝力謳謌頌明主陶然墟里間終歲

同樂處

龍給事湖心草堂圖

巢湖介淝舒子昔所棲遲葺茅結幽宇遠託湖中坻開  
軒面遠岫繞檻蕩文漪幽坡藉丰茸芳林孽歲蕤遠絕  
往還跡閒適惟詩書竭來遊虎闈邇迤登赤墀馳聲倚

文翰焯有好爵縻豈不懷初服引睇渺天涯致身義所  
重在舊仁不遺自公有餘暇披圖寫遐思

送周孟簡乃兄

龍樓徹五鼓城上烏啼曙客子思故鄉晨衣出門去猶  
顧玉堂館忽別金陵浦明日大江干相思荆樹寒

王孟宣輓詩

四時迭遷易化運無停機人命合堅固忽為朝露晞平  
生所親愛誰不悲永違況乃德之良特達衆所希惇行

孝與弟踰履慎其微百歲自恒道胡為中路萎不見涼  
薄人高年踰耄者古謂仁者壽聖言豈云非松栢繞丘  
墳蕭蕭起寒颶即此杳長夜念之增歔欷

送王裕歸臨川

朔風暮已厲薊門凜寒霜之子返故邑星言肅遐裝長  
跪拜慈父含悽別高堂親愛自天性誰不情內傷所懷  
在重闈晨夕遙見望驅車逐徒侶欲往仍彷徨為孝行  
所先養志古所臧翩翩丹鳳雛五色會高翔含輝璞在

石戒溢川維防愛子以進脩眷言贈斯章

玄默齋詩

至道本無為達人識其原靜居玩羣化通復皆自然物  
理諧妙契緬邈適大觀懷中老聃書置之已忘言冲澹  
頤性靈寂寞臥雲山松栢蔭庭外衆卉羅松邊聊以驗  
氣序隨時樂吾天余始識其人翩翩復高騫何當徃從  
之俱遊象帝先

贈曾生景銘

景銘其先吾郡人倚居番禺今生以薦台至有司援近例格之生來

辭歸因  
贈之詩

君子重時命有塞必有通古來才智人豈必畝畝終晚成見大器特達會奮庸曾生格有司追遙理歸蓬璞玉寧久闕志士寧久窮林居有餘暇徃懋切磋功

孫給事小畫

俱懷堅貞節雲根偶相遇投我雙翠翹報以珊瑚樹永矢冰霜時懼依共遲暮

送陳生還吉水

子魯之子子魯時起自謫所官吏部且續娶生以祖母之命來

省

家住文江頭東望秦淮淚戀戀父子情迢迢隔山水粵  
昔奉父母留侍大母居重闈供甘旨旦夕承婉愉久違  
父膝下仰慕聞詩禮况乃大母心惓惓念行子北地困  
遠涉風霜多苦顏幸復荷榮寵何時見爛斑昨者促我  
來令我慰羈旅臘月達京城升堂拜父母我父見子來  
驚起還悲歎別時汝總角汝今已勝冠我母見子來憐  
我克孝敬念我涉苦辛問我行久近各言問大母大母

今壽康聽答未及已零淚沾衣裳我留侍父母藹藹天  
倫樂誨語日殷勤離懷頓舒豁舒懷未幾許我父呼我  
言父母喜汝來大母溪汝旋我未報國恩養親誠賴汝  
事父汝日長端歸勿辭苦拜跪受父教黽勉惟敬承晨  
起別高堂揚舲復南征維時二月初春風動楊柳父執  
書贈言朋游勸行酒人生尚孝行子歸重操脩矧子英  
妙年勉學循嘉猷而翁我同朝且復同鄉郡何以贈子  
行努力崇令問

送黃學士還永嘉

宗豫之父

五章

聖皇御宸極垂拱朝萬方時康洽泰和化理侔虞唐公  
卿侍黼扆文儒列成行濟濟集天衢輝輝被寵章

寵章一何盛濂源嘉所生文錦盤雙龍奎光煥然明豈  
但隆褒數重以命秩榮餘齡沐天澤感激深中情

深情仰都畿逝將謁天子夕發斗城隅晨趨闈闥裏鶴  
髮耀冠纓龍顏顧為喜拜稽頌萬年惓惓未能已

惓惓事君忠雖耄志益強載來即華館嘉慶洽中堂怡

愉奉甘旨拜跽陳壽觴眷言皇天慈奕世弗可忘

弗忘在君親桑梓翳丘園別離未幾時履此霜露繁遡  
遙遵返路靡靡涉川原來歸誠所忻戀闕心彌敦

蕭處士輓詩

懸象無停運四時迭遷逝人非金石堅百歲忽如寄有  
生必有終惟德世所貴夫子武夷秀家承蘭陵系寡欲  
出天賦惇行在倫誼飭躬仗忠貞及物崇惠施棲遲恒  
采芝淹留聊攀桂道遙以卒歲頽然謝塵世天道顯而

信世澤久益大令子奮六藝華聲揚旆旆身有好爵縻  
行惟先人似源深自流遠繩繩殊未替頗仰念潛德因  
之徵來裔



東里續集卷五十四